

Oqaasiliortut ataatsimiinnerannit imaqarniliaq

Sumiiffik:	Ilimmarfik ini nr. 7
Ulloq:	17.02.2017
Nalunaaqutaq:	10:30-12:30
Oqaasiliortuni peqataasut:	Mariia Simonsen, Mette L. Lyberth aamma Bolatta M. Vahl
Peqataangitsut:	Jens Danielsen aamma Juaaka Lyberth
Allatsi:	Minik Jeremiassen
Ataatsimiinnerup normua:	1

Oqaluuserisat

1. Oqaluuserisassat akuerineqarnerat
2. Kingullermik imaqarniliap akuerineqarnera
3. Oqaasileriffimmiit ilisimatitsissutit
4. Oqaasiliortunut saaffiginnissutit:
 - 4.1. Sans, lugtesans, følesans, synssans, høresans aamma smagssans
 - 4.2. Juridisk person
 - 4.3. Frysepunkt
 - 4.4. Selvstændighed (politikkimut tunngatillugu)
 - 4.5. Grævling aamma jærv
 - 4.6. Afdeling for samfundsvidenskabelige og økonomiske studier
 - 4.7. Kompetence aamma færdighed
 - 4.8. Atorfiit taaguutaat RAL-imut tulluarsarneqartariaqartut
 - 4.9. Eqqartuussivimmi taaguutit
 - 4.10. Atertut qinnutigineqartoq Joora
5. Taasariaqartut allat
 - 5.1. Ataatsimeeqqinnissamut ulluliineq
 - 5.2. Oqaasiliortut suliaasa killiffiannik ilisimatitsineq
 - 5.3. Imaqarnilianik torersaaneq
 - 5.4. Ilaasortanit taasariaqartut allat

Imaqarniliaq

1. Oqaluuserisassat akuerineqarnerat:

Atertut qinnutigineqartoq Jooqa oqaluuserisassatut siunnersuutini 4.j-imut ilanngunneqareemat oqaluuserisassat akuerineqarput.

2. Kingullermik ataatsimiinnermit imaqarniliap akuerineqarnera:

Imaqarniliaq akuerineqarpoq.

3. Oqaasileriffimmiit ilisimatitsissutit:

Pisarneq malillugu Oqaasileriffiup pisortaata Katti Frederiksenip ilisimatitsissutit ataatsimiinnissaq sioqqullugu Oqaasiliortunut nassiuppai. Ilisimatitsissutitut nassiunneqarsimasoq bilaginngorlugu quppernermut kingullermut ilanngunneqarpoq.

Oqaasileriffiup pisortaa peqataasussaagaluarluni naammassineqartariaqartunik suliaqarnini peqqutigalugu peqataanngitsoorpoq.

Ilisimatitsissutinut Oqaasiliortut isummernerit imaapput:

Imm. 1

- KNR-TV-mi aallakaatitassiaq 'Oqaasilerisa' pillugu:

- Oqaasiliortut isumaqarput aallakaatitassiaq pillugu sukumiinerusumik ilisimatinneqartariaqarlutik. Suliniutip taassuma allaatigineqarneranik (projektbeskrivelsemik) Oqaasiliortut takusaqarusupput.

- Oqaasiliortut isumaqarput aallakaatitassiami isiginnaartunut oqaasilerinerup tungaatigut inorsiisoqartoq. Kasusip modusillu aallakaatitassiami atorneqarsimanerat assersuutigaat, tassa isumaqarput oqaasilerinermik ilisimasaqanngitsunut taaguutit taakku kalaallisut paasinarsarneqarsimasariaqaraluartut.

- Aallakaatitassiaq pillugu Oqaasiliortut isummaminnik Oqaasileriffimmut nassiussinnginnerminni aallakaatitassiap imarisaanik misissuillaqqaassapput.

Imm. 4

Apriliip 20-anni Islandimi Center for Verdenssprogip ammarnersiorneqarnissaa pillugu:

- Kikkut angalanermut aningaasaliisuussanersut paasiniaqqaarlugu Oqaasiliortuniit peqataasoqassanersoq aalajangerneqarumaarpoq.

Iisimatitsissutitut ilaanngitsut pillugit:

- Oqaasileriffiup KNR-imi kalaallisut pikkorissaasalernissaa Oqaasiliortuniit sumut killinnersoq qanorlu ingerlanniarneqalersaarnersoq paaserusunneqarpoq.

- Oqaasileriffiup nittartaga pillugu:

Oqaasiliortuniit Oqaasileriffiup nittartagaata iluarsanneqarnissaa piumasarineqarpoq.

Oqaasileriffiup nittartagaata ajortumik inissisimanerata Oqaasiliortut suliarisarsimasaasa takuneqariaannaannginnerinik ilaatigut malitseqarpoq. Ataatsimiinnermilu tullermi Oqaasileriffiup nittartagaata iluarsanneqarnissaa Oqaasileriffiup ningiua peqatigalugu immikkut oqallisigineqassaaq.

- Oqaasiliortut piunasaqaataat pillugit Oqaasileriffik naapeqatigineqartariaqartoq Oqaasiliortut isummerput. Tamatuma qaqugu pisinnaaneranik erseqqinnerusumik oqallittoqanngimmat ulluliisoqanngikkallarpoq.

4. Oqaasiliortunut saaffiginnissutit:

4.1. Sans, lugtesans, følesans, synssans, høresans aamma smagssans:

Pineqartut kalaallisut assigiinngitsunik ukiut ingerlanerini ordbogini, taaguusersuutini atuakkanilu assigiinngitsuni assigiinngitsunik taagorneqartarsimapput.

Ilinnisiortuup saaffiginninneratigut taaguutit Oqaasiliortuniit ataatsimiinnermi matumani aalajangersarneqarput.

Taaguusiussaasarsimasuni naanerit assigiinngitsut marluk atorneqartarsimammata siulliullugu eqqartorneqarpoq naaneq sorleq taaguutini atorneqassanersoq:

-ssut imaluunniit -ssuseq.

Sanser tassaapput inuup timaani malugissutitut atorneqartartut, taamaattumillu naaneq -ssut atorneqassasoq aalajangiunneqarpoq.

-ssuseq tassaavoq annertussiliinnermut (gradiliinnermut) tunngasoq, taamaattumillu inuup malugissutitut atortuutitut atugassatut tulluarsorineqanngilaq.

Meddeler om Grønland-imi 1983-imeersumi Michael Fortescuep allaatigisaa "A comparative manual of affixes for the Inuit dialects of Greenland, Canada, and Alaska" matumani najoqqutarineqarpoq. Pineqartut Fortescuep ima nassuiarsimavai:

- ssusiq (quality of)

Reduced to ss in Maniitsoq for exclamations. Plural = ssutsit (and cf. utsit from usiq).

- (ss)ut (means/instrument/cause)

Also (q)utaq and (q)qut. ssut esp. for 'reason'.

Oqaasiliortut taaguutissatut aalajangiussaata imaapput:

sans, malugissut*

de fem sanser, malugissutit tallimat

lugtesans, naamassut

følesans, malugissut**

synssans, isigissut

høresans, tusaassut

smagssans, susunnimut malugissut

* & **: Malugissut assigiinngitsunik marlunnik isumaqarpoq.

Ataatsimeeqqinnissaq nallertinnagu inunnu aalajangersimasunut taaguutissatut aalajangiunneqarsimasut tusarniaassutigineqassapput. Tassa ataatsimeeqqinnissamut allannguutissanik siunnersuuteqartoqarsimanngippat ataatsimiinnermi matumani aalajangiunneqartut atorneqassapput.

4.2. Juridisk person:

Oqaasileriffiup saqqummersitaani "Taaguusersuutit - pinerluttulerinermut, eqqartuussisarnermut, aningaaserivinnut, timillu pisataanut tunngasuni" 2000-imeersumi juridisk personimut "inatsisitigut pisinnaatitaasoq pisussaataasorlu" Oqaasiliortuniit akuerisaasutut allassimagaluartoq Inatsisartut Allattoqarfianiit Oqaasileriffimmut nalunaarutigineqarpoq pineqartoq assigiinngitsorpaalunnik kalaallisut taagorneqartarsimasoq.

Oqaasiliortut taaguutip allanngortinneqarnissaanik patsisissaqarsorinnginnamik taaguutaareersoq atorneqaannassasoq aalajangiuppaat.

Inatsisartut Allattoqarfianiit taaguutissatut siunnersuutigineqaraluartoq tassaavoq "inatsisilerinermi immikkoortut inuttut isigineqarsinnaasut", taanna Kapisilinniarneq pillugu Namminersorlutik Oqartussat nalunaarutaanni nr. 20-mi, 9. oktober 2015-imeersumi atorneqarsimavoq.

4.3. Frysepunkt:

2011-mi oktoberip 21-anni Oqaasiliortut ataatsimiinnerannit imaqarniliami ima allassimasoqarpoq:

Oqaaseq Qerinnarpoq:

Oqaasiliortut aalajangerput frysepunkt aamma 0 grader pineqartillugit oqaaseq una atorneqartassasoq: qerinnarfik, s.i. issisiut qerinnarfiup nalaaniippoq. Ilaasortat ilisimavaat sumiorpaluutini ippigineqartaraluartoq atorlugu sungiunneqarsinnaasoq.

Taaguut qerinnarfik taamani Oqaasiliortut ilaasortaasa ilimagisaattut ippigineqartarsimavoq Oqaasileriffillu KNR-imiit ilisimatinneqartareerpoq taaguut taanna KNR-imut ippigalugu saaffiginnittoqartarsimasoq.

Taaguut 'qerinnarfik' atorneqaannassaaq, TV-kkulli radiukkullu silassamik ilimasaarinermi 0-gradimut/frysepunktumut 'kiaganilu issi[ssa]nngilaq' atorneqartassaaq.

Assersuutigineqarpoq iganermik ilitsersuusiornermut tunngatissagaanni 0-gradimut imaluunniit frysepunktumut 'qerinnarfik' atorneqarpat paatsoorneqartussaannngilaq erngup qerilersarfiata killigimmagu.

4.4. Selvstændighed:

Ataatsimeeqqinnissamut kinguartinneqarpoq.

4.5. Grævling aamma jærv

Ataatsimeeqqinnissamut kinguartinneqarpoq.

4.6. Afdeling for samfundsvidenskabelige og økonomiske studier:

Oqaasiliortut decembarip 16-anni 2016-imi taaguutissamik aalajangiussereersullu Ilisimatusarfimmiit ilisimatitsissutigineqarpoq qallunaatut taaguutaani oqaatsinik marlunnik paarlaasoqarsimasoq, tassa oqaatsit "økonomiske" aamma "samfundsvidenskabelig" paarlaanneqarsimapput.

Una atorunnaarpoq:

Afdeling for økonomiske og samfundsvidenskabelige studier Aningaasaqarnermik Inuiaqatigiilerinermillu Ilisimatusarnernut Immikkoortortaq

Allannguut atuutilersoq imaappoq:

Afdeling for samfundsvidenskabelige og økonomiske studier

Inuiaqatigiilerinermik Aningaasaqarnermillu Ilisimatusarnernut Immikkoortortaq

4.7. Competence aamma færðighed:

Ataatsimeeqqinnissamut kinguartinneqarpoq.

4.8. Atorfiit taaguutaat RAL-mut tulluarsarneqarsimasut:

Ataatsimeeqqinnissamut kinguartinneqarpoq.

4.9. Eqqartuussivinni taaguutit:

Ataatsimiinnermi oqaluuserineqanngillat.

4.10. Atertut qinnutigineqartoq Joorá:

Atertut qinnutigineqartoq Angajooqqamiit naalisarlugu Jooranngortinneqarsimasoq nukappiaqqat niviarsiaqqallu aqqattut akuerineqarpoq.

5. Taasariaqartut allat:

5.1. Ataatsimeeqqinnissamut ulluliineq:

Ataatsimeeqqinnissaq pissaaq 15.-17. marts 2017.

5.2. Oqaasiliortut suliaasa killiffiannik ilisimatitsineq:

Oqaasiliortut suliaasa killiffiat pappialanngorlugu Oqaasiliortunut ataatsimiinnissaq sioqqullugu emailikkut nassiunneqarpoq.

5.3. Imaqarnilianik torersaaneq:

2016-imi januaarimiit ullumimut imaqarniliaasarsimasuni oqaluuserisassat suuneri quppernermut siullermut takusassiaralugit allanneqassapput, taamaalilluni atuartussamit ajornannginnerusumik suut oqaluuserineqarsimanersut takuneqarsinnaalissaaq. Tassa imaqarnilioriaatsip ilusaa allannguuteqalaassaaq, tassungalut ilutigitillugu ataatsimiinnerup normua imaqarniliani ilanngunneqartalissaaq.

5.4. Ilaasortaniit taasariaqartut allat:

Oqaaseqartoqanngilaq.

Oqaasiliortut

Bolatta M. Vahl, siulittaasoq

Mariia Simonsen

Mette L. Lyberth

Allatsi

Minik Jeremiassen



Oqaasileriffimmit paasissutissat

1. KNR-TV-kkut aallakaatitassiat 'Oqaasilerisa' Oqaasileriffiup KNR-illu suleqatigiillutik immiuppaat, ataasinngornerit tamaasa nutaamik aallakaatitassiaaqqamik aallakaatitsisarpugut. Immiussassani 20-usuni maanna qulingiluat amigaataapput. Qujanartumik Tusagassiortunngorniat Ilinniarfiata immiussisarfia atorsinnaagallartillugu immiussinerit sukkatsinnerupput. Februaarip ingerlanerani naammassissapput, upernaarlu naallugu aallakaatinneqartassallutik.
2. Oqaasileriffik Ilimmarfimmi 2.salimi allaffittaarpoq, tassani nutserusiornermik suliaqartussat inuit pingasut allaffeqassapput. Nutserummik suliaqarneq aallartereerpoq, taamaattoq siumut sukumiisumik pilersarusiornissaa maajip 12-ianniit 14-iata tungaanut ataatsimiissutigissavarput pikkorissaanertalimmik.
3. Ilitsoqqussaralugu Oqaatsit Ulluat 21.februar nalliussissavarput, tamatumuuna Nuuk Centerimi 16.00-17.30 aliikkusersuinertalimmik inuit assigiinngitsunik oqaasillit erinarsorlutillu/ileqqorsulutillu saqqummiussillutillu atuffassisassapput. Nipilersorlutik akunniliisussat sulii pissarsiarinngilarput.
4. Apriliip 20-anni Islandimi Center for Verdenssprog ammaanersiorneqassooq tassani Nunat Avannarliit Killiit oqaasilerinikkut suleqatigiivi qaaqqusaapput, maangaanniit KF aamma PL. Isumaqaarpunga Oqaasiliortut aamma aallartitaqarnissaat periarfissarsiuunneqarsinnaasoq. Paasissutissat uaniipput:
http://vigdis.hi.is/vigdis_international_centre_for_multilingualism_and_intercultural_understanding
5. Kalaallisuumiit tuluttuumut ordbogi kukkunersiorneqarluni ingerlanneqarpoq. Taanna pereerpat app-iliarineqarnera misilerarneqarsinnaalissaaq.
6. Killiffilersuutit sulii ingerlanneqarpoq, suleqatigiinni inuit pingasuugaluarluta marluinnanngoratta arriinnerulaaleraluarluta naammassiliivippugut. Deadline kingusinnerusukkut ullulernerqassaaq grafikerip isumaqatigereerneratigut.
7. Oqaasileriffik Velux Fondenimut qinnuteqaasiorpoq projektimut ukiuni pingasuni ingerlasussamut. Taassuma imaraa allannermik ajornartorsiutilinnut qarasaasiakkut programmimik ikiummik pilersitsinissaaq. Tassani suleqatigiit ukuningga inuttaqarput: Inerisaavik, ScanDis A/S, JFO Kommunikation, Sermersooq. Qinnuteqaat sap.akunnerata ingerlanerani nassiutissasoq naatsorsuutigaarput.

8. Inuusuttut Paasiniaasut (Unge Forskere) apriilip arfernaniit 17-iata tungaanut ingerlanneqassaaq, illoqarfinni ukunani: Sisimiut, Aasiaat, Qaqortoq Nuullu. Tassani Oqaasileriffik CBS-lu suleqatigiillutik sprogteknologiimik pikkorissaallutik workshoppeqartitsissapput GU-qarfinni. Neriulluta inuusuttut aamma oqaatsitigut teknologiimik suliaqarnissamut kajuminnerulissasut. Namm.Oqart. aningaasaliinissamut akuersinikuuvoq.
9. Ukioq 2016 aningaasaqarnikkut ajunngitsumik anigorparput. Bilag 1 takusiuk.
10. Oqaasileriffiup 2017-imi aningaasatigut inatsikkut aningaasalerneqarnera allannguuteqangaangilaq, 24.000 kr.-nik qaffalaarnikuupput, tassa 4.198.000 DKK Ukioq mannamut aningaasartuutissat takussutissaat quppernerup tulliani takuneqarsinnaapput.

Inuss.inuull.

Katti Frederiksen

Apeqqtissaqassagaluarussi aamma kfre@oqaasileriffik.gl-imut allaannarsinnaavusi :)